

## ATODLEN 18

### RHYDDHAD ELUSENNAU

#### *Elusen nad yw'n elusen gymwys*

- 5 (1) Mae'r paragraff hwn yn gymwys—
- pan na fo trafodiad tir wedi ei ryddhau rhag treth o dan baragraff 3 am nad yw'r prynwr yn elusen gymwys, ond
  - bod y prynwyr yn elusen ("E") sy'n bwriadu dal y rhan fwyaf o destun y trafodiad at ddibenion elusennol cymwys.
- (2) Mewn achos o'r fath—
- mae paragraffau 3 a 4 yn cael effaith fel pe bai E yn elusen gymwys, ond
  - at ddibenion paragraff 4, mae "digwyddiad datgymhwys" yn cynnwys y canlynol os cânt eu gwneud at ddiben ac eithrio hybu dibenion elusennol E—
    - unrhyw drosglwyddiad gan E o brif fuddiant yn holl destun y trafodiad a ryddheir neu unrhyw ran ohono;
    - unrhyw les rhent isel a roddir am bremiwm gan E am yr holl destun hwnnw neu unrhyw ran ohono.
- (3) Mewn perthynas â throsglwyddiad neu les a roddir sydd, yn rhinwedd is-baragraff (2)(b), yn ddigwyddiad datgymhwys at ddibenion paragraff 4—
- dyddiad y digwyddiad datgymhwys at y dibenion hynny yw'r dyddiad y mae'r trafodiad a ryddheir yn cael effaith, a
  - mae paragraff 4 yn cael effaith gyda'r addasiadau yn is-baragraff (4).
- (4) Yr addasiadau i baragraff 4 yw—
- mae is-baragraff (4) i gael effaith fel pe bai "Yn union cyn" yn cael ei roi yn lle "Ar adeg";
  - mae is-baragraff (6)(a) i gael effaith fel pe bai "yn union cyn ac yn union ar ôl" yn cael ei roi yn lle "ar adeg";
  - mae is-baragraff (6) i gael effaith fel pe bai paragraff (b) wedi ei hepgor.
- (5) At ddibenion y paragraff hwn—
- rhoddir les "am bremiwm" os oes cydnabyddiaeth ar wahân i rent, a
  - mae les yn les "rhent isel" os yw'r rhent blynyddol (os oes un) yn llai na £1,000 y flwyddyn.
- (6) Yn y paragraff hwn—
- mae i "rhent blynyddol" yr ystyr a roddir gan baragraff 36(2) Atodlen 6, a
  - mae i "rhent" yr ystyr ag a roddir yn yr Atodlen honno.